

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA TESEMA 2023

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)

## OSIGA FEAGAIGA EFKS MAOTA, FAASALELEAGA



Rev. Uta & Feula Muaulu, Rev. Letaulau & Tina Pesaleli, Rev. Letaulau Esau Poufa Pesaleli & Sarai ( Faafeagaiga EFKS Maota), susuga Leaso Tupa'i FT & Faafetai.

## OSIGA FEAGAIGA EFKS SALUA TAI, AANA



Rev. Faulalo Kennar & faletua ia Beauty Finau Kennar (faafeagaiga EFKS Salua tai)

# FAASINO UPU

|                              |    |
|------------------------------|----|
| 1. O LE LAUGA                | 2  |
| 2. OSIGA FEAGAIGA IA TESEMA  | 4  |
| 3. LAUGA I OSIGA FEAGAIGA    | 5  |
| 4. O KERISO LE KERISIMASI    | 7  |
| 5. O LE PEROFETA MULIMULI    | 8  |
| 6. O E UA FAI I LAGI FOLAUGA | 12 |
| 7. NA O AFIGA E TULEI MAI    | 15 |
| 8. ATA O MATAUPU LOMIA       | 16 |

## O LE LAUGA

Tusi Faitau: Ioane 1: 1 – 9

Matua: *“<sup>1</sup>Sa i le amataga le Upu, sa i le Atua le Upu, o le Atua foi le Upu.”*

Manatu Aoao Vaiaso: KERISIMASIMA IOANE

Manatu Autu o le Aso Sa (24 Tesema 2023):  
SA I LE AMATAGA LE UPU

E eseese taeao o le au fai Evagelia, i la latou molimauina o le Tala Lelei i le Keriso, le auga o aute o le Kerisimasi i tausaga taitasi. Na mua i malae le Faletolu o Sinopi. Ma e ui ina e taga tasi a latou folasaga o le soifuaga ma le galuega a Iesu (fanau mai, papatiso, a’oa’o ma fai vavega, faamasino, faasatauro, toe tu), a e ma’oti lava ma ‘ese’ese matalalaga na mamana ai la latou tofa taitoatasi. O nisi faaitaiga nei.

O Mataio o le Iutaia o loo tusi faapitoa i le au Iutaia. Ua na tala le gafa o Iesu, o le gafa tau tupu o le aiga o Tavita, e tau ia Aperaaamo. Peiseai o loo faapea atu Mataio i ona tagata Iutaia, o lo

tatou Tupu lenei, o lo tatou Mesia ma le Faaola lenei sa tatou faatalitali i ai. O Ia lenei, **ua taunuu ai** a tatou tulafono, o a tatou au perofeta, le tatou tapuaiga Iutaia, lo tatou tala faasolopito, le Feagaiga Tuai atoa. O lana faaupuga fai soo, e faamaonia ai lana mau, *“E pei ona tusia...”*

O se tasi o matalalaga a Mareko, le aupito itiiti, ma pu’upu’u o lana Tusi; e faanatinati, e vave lona faatamo’ega. O le natura lea o le auauna, e faatopetope ia vave uma ana feau, e tusa ma lona tofi faa-tautua a le pologa faamaoni. E faapea le tautua a le Keriso, le auauna o loo molimau i ai Mareko. E leai sona gafa, aua o le auauna ma le pologa. A e lē pei la o le gaiogi a tama o le Faasalele, fai mai e mata a e vave. Peita’i le tautua toto o loo molimau i ai Mareko, e mae’ae’a ma atoatoa, a e vave ona fai, ‘aua le tu’u umi, ‘aua le tosotoso loloa. E vave, ona e mafuli i le faamatalaina o vavega, ma galuega alofa sa fai, le gaiogi a Iesu. Tau leai ni a’oa’oga i upu ma tala. E aunoa ni talagā gafa, leai ni lauga uumi i luga o mauga, po o taumavaega ma ona soo. A e a’oa’o ma faatonu e ala i lana galue ma faatino, e tautala galuega. Ua ‘oto e Mareko le moemoe, e fia momoli faavave le feau, ua vave le taimi, vave le toe afio faalua mai o le Alii, ia toatele e faitau, ia talitonu, ma faaolaina i le salamō ma faatuatua.

O Luka o loo tusi, e lē gata ia Iutaia a e faapea foi i Eleni, Roma ma soo se tagata o nuu ese. Ua na tala le gafa o Iesu, te’a mai Aperaaamo, a e tau i tua ia Atamu le uluai tagata. O se tasi o ana feau faamamafa, o Iesu o le tagata a’ia’i, le Atamu lona lua ua afio mai e faaola le lalolagi ua agasala, talu le ulua’i Atamu i Etena. Ua ta’utino e le foma’i ia Luka, o le Foma’i Sili lea ua afio mai na te togafiti le gasegase o le fanau a tagata; na o Ia e maua ai le manuia, le filemu moni, ma le nofo fealofani o le lalolagi.

Ona toe lea o Ioane. Ua manatu le soo na alofaina, ua lava molimau a le au uso a Sinopi, i le soifua ma le galuega a Iesu. Ona ia si’i lea o le matalalaga fou, faamamafa pe faapefea le soifua, le amio, le foliga faaleagaga o Iesu? Ua ia tala le gafa, tuu i le loloto, tuu i le mea e gata ai, lana faatamasoaliiga. Le soifuaga e tupuga, lata mai Aperaaamo, te’a mai Atamu, a e tuu i le amataga

---

o mea uma, tau i le Atua. *Sa i le amataga le Upu, sa i le Atua le Upu, o le Atua foi le Upu.* O le upu Eleni o le *logos/lokou*, o lona uiga **o le upu**. A e faasino foi i fuaiupu, faamatalaga, vagana fetalai, afioga tau momoli, e oo lava i talanoaga, felafolafoaiga, le gagana faatonu ma faasino, le tofa foafoa ma le utaga gaosi o le Atua, o lea ua liutino tagata nei, ia Iesu. A talatala pea le uiga lautele, e faasino foi i talanoaga, fetufaa'iga, fefaasoa'iga, o fesootaiga vavalalata a le tasi tagata ma le isi.

O le tasi faamoemoe o Ioane, i lona faalupe o Iesu o le Upu, peisea'i o loo ia faapea mai, Faalogo mai, le lalolagi e, e i ai se upu, se feau mai le Atua, o loo fia fesootai mai, o loo fia ta'u mai ia i tatou. Ma o le taimi lenei, e lē toe auala mai i ni papa maa pei ona sa faia muamua, e lē toe auina mai foi ni perofeta. O le taimi lenei, o la lava ua afio mai. O la lava le feau tau molimoli. Ma ua na valaauina ai i tatou uma e talanoa, e fesootai, faasoa, fetufaa'i ma Ia. Ia fesoota'i foi le tasi ma le isi, i le faamoemoe e faalautele, faasalalau le Tala Lelei o le faaolataga ua faia e le Atua.

O le maitau i taaviliga o le lalolagi o aso nei, ona o aafiaga o le tekonolosi, e peisea'i o le tasi vaega ua sili lona taua ma le aoga i le soifuaga o le tagata - o fesootaiga i faamatalaga, o faasalalauga ma le faalauiloaina o le tagata lava ia, o ona talaaga ma ona manaoga. Aemaise o faamatalaga o mea o tutupu i lona si'osi'omaga; e aofia ai mea moni, sa'o ma amiotonu, faatasi ai foi ma le tele o faamatalaga pepelo, o tala fatu ma tala faatupu, o tala faafoliga, tala e ufiufi ai le amioletonu, mea pi'opi'o ma mea mata'utia le inosia, o mea faapaupau faatupu mala. A o fesootaiga nei ua sili ona fiafia i ai tagata o auga tupulaga o aso nei. A ua maitauina foi, le vaivai o le leo faaperofeta ma le Upu folafola mai le Atua e faafetaia'i ma faatonutonu ai nei fesootaiga.

O se luitau malosi lenei mo le Ekalesia o aso nei, ina ia faamalolosi e fai fesootaiga lelei, e molimauina ai le malamalama o le Tala Lelei, o i ai le Upu liutino i a tatou fesootaiga. O le talanoa faasamasamanoa, pe talanoa i se tulaga aloaia, ia fa'aautu i mataupu e maua ai le ola, maua ai le

filemu ma fealofani. Soia le faaleaga, ta'uleaga, faaleaoga le taumafai o nisi uso ia Keriso. Pe afai foi e faalogo atu i ai, ia loto tele e taofi ma faaitiitia le faatausuai ma le faatauemu. Ia faavae fesootaiga ma talanoaga, le faatofalaiga i le alofa pei ona alofa mai ai Keriso i lana Ekalesia, o le alofa faamagalalo. A e le o le faavae i le tau ma sui, o le fetuia'i, le taulamalama o le tasi i le isi, o le 'eli o le lua e pa'u i ai le isi, po o le faapona o le maea, e tautau ai le isi, e tusa o le maitau atu i nisi faai'uga fai.

I le ma le isi, ia saunia lelei le au fai upu ma failauga, i le Upu folafola mo le fofoga taumafa faaleagaga o tatou tagata. Pe le o se tasi lea ala o le o ese atu o tagata EFKS? Ina ua na o le tali lelei o faamanuiaga faaletino, a e le mamafa le manatu i gasesega o le Upu folafola. Fai mai nisi, e manaia le lololo o le fai'ai pusi, pe ana le tele ona ivi. Tatou faamalolosi e folafola le Upu e faaola, faatupu malosi, faamafanafana. Ma ia tatou taulamua, ia solomua foi e savavali e faatino le Upu tatou te folafola, aua o le Upu foi lea e faamasinoina ai i tatou.

E i ai le feau lautele e laugatasia ai tatou uma ma isi tagata faatuatua uma, o loo valaau mai ai le Atua ia i tatou uma. E i ai manaoga e taga tutusa ai i tatou uma, ina ia tatou maua se lalolagi filemu, se lalolagi maloloina mai mala ma puapuaga. A e i ai foi le feau faapitoa mo le tagata lava ia, o loo fia talanoa mai ai le Alii ia te oe, ia te a'u, i lenei Kerisimasi. Pe afai e lelei lau faafofoga, i le mea lilo e to'a filemu, na o oe ma Ia, ona e lagona lelei lea. E tofu foi le tagata ma se mea o mamafa i lona loto i lenei Kerisimasi. O le faamanatu mai a Ioane, ia talanoa, fesoota'i, logo le Alii, e ala i le tatalo ma le anapogi, fesili ia te Ia.

E moni e ati lana silasila, na te silafia o tatou loto ma mea lilo uma. A e se'i vaganā ua tatou matua'i ta'utino ma tautala atu, faaleo i le gagana ma le upu, ma le loto faatuatua o tatou manaoga, ona faato'ā tali mai lea o Ia. E lē afaina pe sa tatou lē fai Kerisimasi ma o tatou aiga, po o uso ia Keriso i le Ekalesia, o uo ma aumea i lenei Kerisimasi, ma soo se Kerisimasi. Ae ua valaaulia i tatou e Ioane tatou te fai Kerisimasi faatasi, ma le Upu sa i le amataga, le Upu na manu'a lona tino ma maligi lona toto, na maliu ae toetu manumalo.

***Faitoaga Tolua (Faatonu Sulu Samoa)***

---

# **3 OSIGA FEAGAIGA IA TESEMA 2023**

## **EFKS MAOTA**

E 3 osiga feagaiga na fai i le masina nei o Tesema 2023. O le tasi o ia sauniga taua ma le mamalu, o le osiga feagaiga a le EFKS Maota, Pulega Palauli Matagaluega Faasaleleaga, ma lo latou faafeagaiga, susuga Letaulau Esau Poufa Pesaleli FS ma le faletua ia Sarai. Na ta'ita'iina lea sauniga e le susuga Leaso Tupa'i FT, le Toeaina o le Pulega, i le Aso Faraile 15 Tesema. O le Lauga mo le faifeau ma le faletua na saunia e Enele Auvaa FS (EFKS Vailoa Palauli), a o le Lauga mo le Aulotu na faia e Uilipefosi Konelio Te'o FS (EFKS Faala). O talosaga na fofogaina e David Mafua AM (EFKS Tafua). O le susuga Letaulau o se lupe faalele a Vailoa Palauli ma le afioaga o Ti'a ma sa Luamanuvae i Salelologa, a o le faletua o se taulaga soifua a le afioaga o Saleilua Falealili.

O Letaulau ma Sarai na i'u mai Malua i le 2019, a o le tausaga 2022 na faau'u ai i le tofi Faifeau Samoa. Ina ua maliu le faifeau talu ai ia Falevi Petana FS, ona tofia lea e le Pulega Palauli o le susuga ia Letaulau na te tausia le galuega i Maota, a o faatali ai so latou faifeau. Mulimuli ane ona tasi lea o le faatofalaiga i le afifio o Taufaaasisina ma Alalamatuatala, le alalatai o Ulu ma Lemaota ma le mamalu i le Toiloto, ina ia avea aloaia Letaulau ma le Faletua, e fai mo latou faafeagaiga. Na talia lelei foi ma le loto faafetai e le faifeau ma le faletua, lo la'ua valaauina mai le Atua e ala i le Aulotu i Maota. Sa la'ua le'i faitauina le tulaga toaitiiti o le aulotu (11 matafale), a e na faamuamua le avanoa ua maua e tautua ai i le Alii o Iesu Keriso ma le galuega o le Tala Lelei, o le faamoemoe na a'otauina ai i Malua, a o se tali atu foi lea i le tapuaiga a matua, aiga ma nuu o loo tu'i mai le mulipapaga.

Na faai'u le aso ina ua silatoga i le e 2 o le Feagaiga, o le tasi na saunia e le Aulotu, na tau'a'ao atu i le faafeagaiga taulagi e tusa ma aga masani, ma le isi le na saunia e aiganalua o le faifeau ma le faletua, na tauaao ma fa'aaloalo atu ai i le Taitai o le Sauniga, le Toeaina o le Pulega. Ona taape lea o le aofia ma le vaa ua goto ma le mama ua lomi, i le taumafataga ma fa'aaloaloga na ma'au i ai le Ekalesia Faapotopotoga Kerisiano Samoa i Maota, Palauli, Faasaleleaga.

## **EFKS SALUA TAI.**

Na asotasi le faamoemoe o le EFKS Maota, ma le osiga feagaiga a le EFKS Salua tai, ma lo latou faifeau susuga Faulalo Kennar FS ma le faletua ia Beauty Finau Kennar, i le Aso Faraile 15 Tesema 2023. O le Toeaina o le Pulega Aiga i le Tai, susuga Taise Ioapo FT na ta'ita'iina le sauniga, Tauapa'i Tufi FS (EFKS Lalovi) na saunia Talosaga, Napoleone Vaiaso FS (EFKS Salua-uta) na lauga mo le Aulotu, a o Piilua Sao FS (EFKS Lapuia'i) na lauga mo le Faifeau ma le Faletua. O Toeaina o le Matagaluega ma nisi Tama o le Ekalesia na fai ma sui o le Pulega, Matagaluega ma le Ekalesia Aoa, e faafeiloa'i aloaia ma faamanuia i le faifeau ma le faletua. Na i'u mai Malua 2019, galue faa-faiaoga i Kolisi a le Ekalesia, faauu i le tofi Faifeau Samoa i le Fono Tele Setema 2022. O le faifeau ia Faulalo e mai le afioaga o Matautu Falealili, a o le faletua ia Beauty o se taulaga soifua a aiga ma le afioaga o Apai Manono. Ia manuia le galuega.

## **EFKS SATAPUALA**

O le Aso Tofi 28 Tesema 2023 na osia ai le feagaiga a le EFKS Satapuala ma lo latou faifeau susuga Gaolo Elisara AM ma le faletua ia Shirley. O le Toeaina o le Pulega Alofi, susuga Simona Manuavai'a FT na ta'ita'i, o Lauga na saunia e Kuresa Tavalani FS (Nofoalii) ma Mose Galuvao FS (Vailuutai), a o Eric Mulitalo FS (Fasitootai/Failautusi Pulega) na faia tatalo ma ta'ita'i le Sakarameta o le Faamanatuga. O le afioaga ia Vaili na molimau fai ma sui o le Ekalesia, i la latou filifiliga na fai i faifeau to'a lima, fulisia ia Gaolo na faamaonia e le Toeaina ma le Failautusi. Na faafetaia e le faifeau ia Gaolo le Laulau o le Fono Tele, le Pule ma le K.F.Malua mo le tapenaina o i la'ua, ma le faafaigaluegaina i le ofisa tutotonu, aemaise le faafetai i le EFKS Satapuala ina ua afe ane la latou faatofalaiga ia te i la'ua. E le'i galo foi le faafetai i le tapuaiga a matua ma aiga. Ia i le Atua le viiga. O le faifeau ma le faletua o lupe na fa'ia mai afioaga o Moataa, Saoluafata, Falevao. Na faato'a i'u mai Malua i le tausaga nei 2023. Ia manuia tele le galuega i le fesoasoani mai o le Alii o Iesu Keriso le Ao o le Ekalesia.

---

## **LAUGA MO LE FAIFEAU & FALETUA EFKS MAOTA**

Matua: Efeso 4:22 - 24, “22 ina ia outou to ese le tagata tuai o loo ua leaga, e tusa ma le amioga faaanamua, e tusa ma tu’inanau e faasese ai. 23 A e peitai, ia toe fuata’iina mana’o o outou loto, 24 ma ia oofu outou i le tagata fou ua foliga i le Atua, i le amiotonu ma le amio lelei e faamaoni.”

Manatu Autu: AVE ESE MEA TUAI INA IA FAAULUFALE MEA FOU

A faataua i o ouluta loto lo ouluta valaauina, ona mafai lea ona aveese uma mea tuai a e faaulufale mea fou. To ese le tagata tuai e leaga ai mea, ave ese ni tu tuai ua masani ai e fai ma faalavelave ma faaseseina ai lo ouluta valaauina. A ia toe fuata’iina o ouluta loto i mana’o lelei e faatupu e le Atua e tusa ma Lona finagalo, e faia ai lana amiotonu, e faia ai le amio atua i le faamaoni. O le faamalosi a Paulo ia Efeso, ia faaleatua le olaina o le soifuaga, ia sa’o le faatofalaiga ma ia sa’o foi le soifuaga e ola ai, e tusa ma le manaoga o le Tala Lelei ua faailoa e Iesu Keriso.

E peiseai e manatu Paulo, e faalagolago le fesootaiga a le auauna a Keriso, i le olaina o le auaunaga i ala ua faasino mai e Keriso. O lona uiga, e le mafai ona auauna ma alofa ia Keriso, pe afai e lē lagonaina, e lē iloaina ma lē malamalamaina e le auauna, le Keriso lea. Fai mai le augani a Paulo, ia aveese le mafaufau i tupua, le ‘oa ma le tamaoiga e pei ona masani ai, leaga e suia ai le tulaga mamalu ma le pa’ia o le Atua i le mafaufau ma le ola o le auauna. Ia ave Keriso ma totonugalemu o le auaunaga; ia muamua, ia ogatotonu, ma ia mulimuli Keriso, ona mautinoa lea ua atoa li’o o le masina i tamaoiga e faasoa mai e le Atua, e faatino ai le tautua tuavae mo lana galuega. Ia aveese mafaufauga ma lagona tuai. Aveese uiga ma amioga tuai ua masani ai. Sui le faamuamua ma aveese ni mea o fai ma atua, ona mautinoa lea ua tagata fou atoatoa, ua tapena e fai ma meafaigaluega a le Atua.

O le valaau alofa lea a le Tala Lelei mo ouluta i lenei aso, lau susuga Letaulau ma Sarai. Leave the old things, the sinful ways behind and draw

close to Christ, enjoy His good ways. Faalogo ma usitai i le tuumumusu mai o le Agaga o le Atua e faatonu folau ai la ouluta galuega, ina ia faia ai lana amiotonu i le faamaoni o ouluta loto. Ia fai malu ouluta faiva. Ia loto tetele ma onosai. Ia ouluta mataala ma faautauta i taimi uma, anapogi ma tatalo ne’i maua ouluta i mailei a le fili. Ia faamalolosi ma finau pea ia ouluta manumalo. Ia ava ma fa’aaloalo le tasi i le isi aemaise le feagai ai ma le Aulotu e oo lava i nai fanau.

E manatu o lea ua ouluta tau masani ia Maota, a e le’i taitai ona ouluta maua uma uiga ma aga ma isi mea i la ouluta silasila. A o le tasi lea o tatou nafa i lo’u lagona, ia taumafai e toe faafou tagata, ina ia latou lagonaina Keriso ma lona alofa. E fou uma loa tagata o Maota, ona faigofie foi lea o la ouluta feau. A ia amata lava ia te ouluta ona maua ai le ola ua faafouina, o le soifua ua pulea ma ta’ita’iina e le Keriso manumalo. Na ia a’oa’o mai le loto maulalo e faatino ai la tatou auaunaga mo Ia ma Lana Tala Lelei, e ala i lona soifua na ofoina atoatoa mai, na maliu i le satauro a e na toe tu manumalo. Merry Christmas & Happy New Year. Ia manuia la ouluta galuega. Amene.

**Saunia: Susuga Enele Auvaa FS**  
**EFKS Vailoa, Pulega Palauli**  
**FAASALELEAGA.**

## **LAUGA MO LE FAIFEAU, EFKS SATAPUALA**

**Matua:** Mataio 1:23, “Faauta, e to le taupou, ma fanau mai le tama tane, latou te faaigoa foi o ia o Emanuelu, o lona uiga pe a faamatalaina, Ua ia te i tatou le Atua.”

**Manatu Autu (AU LEOLEO):** EMANUELU, UA IA TE ITATOU LE ATUA

O nisi upu a le tupu o Solomona, na ia faamati’e ai le silisili ese o le auai mai o le Atua ia Isaraelu, i le faapaiaina o le malumalu i Ierusalem e pei ona ta’ua i le 1 Tupu 8:27, “Pe moni ea e afio le Atua i le lalolagi? Faauta, o le lagi ma le lagi o lagi, e le ofi ai oe; e le atili ai ea ona e le ofi i lenei fale ua ou faia?” O upu a Solomona e faaleo ai le viiga o le pule aoao a le Atua. Le pule aoao a le Atua e laei i lona alofa tunoa. O



---

upu e toe faailoa i tagata Isaraelu, e silisili ese le Atua o Isaraelu - o le Atua o atua, o le Alii o alii. O upu e faaleo le mautinoa o le auai mai o le Atua e puipui, e faamalosi'au ma faamafanafana i lana tagata, na la tapuaaoina i lona faatusa paia i le amataga. Le tagata soifua na Ia faia. E ui lava ua pa'u i le agasala ona ua lape le faiga filifiliga i Etena, a e ua tuu avanoa pea i ai le Atua. Tuu i ai le avanoa e le Atua e toe ola ai, mo le manuia ua ia saunia i le ola faavavau. Le alofa tulituliola lea o le Atua mo le tagata, e toe maua ai e le tagata le ola fiafia, ma olioli ai i le ola nei.

O le lagona lea o loo atagia i upu a le tusitala o Mataio e pei ona faitauina. Fai mai, ua fanau mai le tama tane e igoa ia Iesu, e faaola le nuu agasala, ua taunuu ai le afioga a le Atua i le perofeta. *“Faauta, e to le taupou, ma fanau mai le tama tane, latou te faaigoa ia te ia o EmanueluL o lona uiga pe a faamatalaina, ua ia te i tatou le Atua.”* O Iesu le Mesia ua fanau mai, o Ia o Emanuelu, o lona uiga, Ua ia te i tatou le Atua. O le afioga lea a le Atua i le perofeta o Isaia, i le vaitau o le ave a Aasa ma tupu o Iuta, i le tala faasolopito o le nuu o le Atua. O se tasi o tupu sa le'i lelei lona tula'i mai e ta'ita'i le nuu. Le tupu sa tele ina ave lana faamuamua i le faalagolago i mea o le lalolagi e pei o le tamaoaiga ma le malosi o nuu tuaoi. A e na ave lea ma mafuaaga na matua toilalo ai sa Iuta i le va ma isi malo. Peitai sa le'i ave faaletonu o Aasa e tuulafoa'iina ai e le Atua ona tagata.

E pei ona iloa i upu nei a le perofeta o Isaia, ua toe faaleo e Mataio. E fanau mai le tama tane na te faaola le tagata agasala, e igoa ia Emanuelu, o lona uiga, Ua ia te i tatou le Atua. O upu e faailoa ai le finagalo o le Atua i ona tagata, i le fememea'i ma le le mautonu i taimi o taua na feagai ma le nuu o le Atua. Na avatu ai le faamalosi'au mai le Atua, soo se taua o le ola - i le tino, le mafaufau ma le agaga, e manatua e le tagata o loo faatasi le Atua ma i latou, e leai se mea e popole ai. Pe faigata, pe tiga, e maua lava le filemu i lona loto ma lona mafaufau, e feagai ai ma taua ia o le ola, ina ua mautinoa le auai mai o le Atua.

O le perofetaga e toe faamanatu i tagata o le Atua, le uiga o le i ai faatasi o le Atua ma i latou. E toe faailoa o le Atua auai mai, o le Atua galue. O le Atua e o faatasi ana upu alofa, ma faatinoga faasolosolo mai o le lavea'iina, o lana tagata faatuatua ua mafatia ma pagatia. Ma o le uiga lea

o le faaupuga: Emanuelu, ua ia te i tatou le Atua. I le afio mai o Keriso e pei ona molimau Mataio, o le Alo o le Atua ua auai faatasi ma le tagata soifua. A o le auai mai, e tele le taua o lona uiga. E le o le auai mai i lona tulaga faa-tupu, a o le faatasi ma le tagata i lona tulaga faa-uauna. E pei o le lagona faa-uauna o loo atagia i nisi o a tatou alagaupu. E pei o le upu e fai i le faiva o le aiga sa Sa'umani, “Ua ta'i alalo le i'a a le aiga sa Sa'umani.” Le i'a fai mai na ea a'e i eleele o Salafai, ma tali malie ai le galala o le fia taumafa. Ua ia te i tatou le Atua, e ala i lona Alo pele o Iesu Keriso. E le faatumutumulima lona faatinoga o le finagalo o lona Tama. E ta'ialalo lava ona faiva. E ala i le ave atoa o lona tagata, i le tino, le mafaufau ma le agaga, mo le finagalo o le Atua. Po o a faigata na feagai ai ma Iesu i le ala, na alu lava ma le faamaoni, ina ia taunuu mea uma, mo le faataunuina o le finagalo paia o le Atua.

Lau susuga i le faafeagaiga ma le faletua, e fou gata lava se tuualalo ona e fou foi i le galuega. A e ave ia le fesagaiga faa-uso i le galuega a le Atua, e faia ai se faamalosi'au mo oulua. E le tuulafoa'iina e le Atua ona tagata faatuatua. Ua manino mautinoa le faatasi mai o le Atua e ala ia Keriso, e pei ona iloa i taimi a o faatasi ma ona soo. Le faatasi mai o Keriso ma ona soo, na fa'aauau i le afio mai o le Agaga Paia ina ua afio Keriso i le lagi. Le Agaga Paia lea, o le Atua ua ia te i tatou, e fai ma Fesoasoani Sili, fai ma faamalosi'au mo oulua ma le galuega fou.

O upu o valoaga a Isaia i le auai mai o le Atua, e pei ona molimau i ai i lenei aso, na fai i taimi o taua na feagai ma le nuu o le Atua. Ioe, e ese foi taua o le galuega tatou te feagai. O taua faalemafaufau, o taua faaleagaga. A o le manatua o le auai mai o le Atua, e maua ai le lototele, e maua ai le mafanafana, e tupu ai le malolosi, i le feau ma le galuega a le Atua. E pei foi ona iloa i le galuega faaola a Keriso, na ia faatino ai le galuega ma le loto maulalo. Ia faia lena ma o ta ala-galue. Ia ta'ialalo pea oulua faiva o le Tala Lelei, e tua i ai le galala faaleagaga o nai ou tagata i lenei vaitau o le soifuaga. E leai lava se isi o tatou faamoemoega, ua na o le Atua lava, le Atua ua folafola mai ua ia te i tatou. Na o Ia e maua ai le mapusaga, pe a feagai ma fita o le galuega; le malosiaga lea na faatino ai e Keriso le galuega faaola, i lona maliu ma lona toetu. Amene.

***Saunia: Kuresa Tavalani FS (EFKS Nofolii).***

---

# ***O KERISO LE KERISIMASI***

---

*“E igoa foi o ia, o le Silisili ese, o le Faipule, o le Atua malosi, o le Tama o le faavavau, o le Alii o le filemu.” Isaia 9.*

O loo lomía e le tasi alii tusitala o Siaki Heifoti faapea: ‘O ai lenei Pepe o Peteleema...na liu tino..valaaulia pese a agelu.. lenei Keriso o le Kerisimasi? O le tali e sau ma le pule e tatagi lelei, *“<sup>14</sup>o ia ua tatou maua ai le togiola, o le faamagaloina lea o agasala.”Kolo.1.* O i tatou o e talitonu ma faatuatua i lona suafa, ua agavaa, ua tofusia i le tofi o le au paia o i le malamalama (Kolo.1:12), ua lavea’iina mai le pouliuli a e aumaia i totonu o le malo (1:13), e ala i le tau ua uma ona togi, ina ia faamautū, ma faamausalī lo tatou saolotoga, lo tatou gafatia ai faapea ma le mafutaga. O Ia le Faailoa, le faatusa o le Atua lē vaia (1:15). Ua aveese le pupuni sa natia ai le misiterio..e leai se tasi na te toe masalo pe faapefea ona foliga, o lona Alo pele toatasi o Iesu Keriso ua afio mai e faailoa mai lona fatu, lona natura, ona ala, lona Atua atoa. Ua faailoa atoatoa mai e Keriso ia i tatou, le Tama i ona tulaga uma tatou te fia malamalama ai. (Ioane 14:9). O Ia le Mataisau foafoa – auā na faia e Ia mea uma lava (1:16) i le lagi ma le lalolagi, na faia foi mo Ia na te fa’aaogā, mo lona finagalo, mo lona mamalu. O Ia na te faatumauiina mea uma (1:17). O Ia le Upu na fetalai ma faia ai mea uma (Ioa.1:3), ma faatumauiina mea uma i le upu o lana pule. E pei ona Ia foafoa, e faapea foi ona Ia taofia. O Ia le ta’ita’i, le pule, le Ulu o le tino atoa, le Ekalesia (1:18), o le amataga, le ulumatua, le faasilisili. Ua Ia maua uma lenei ofisa e ala i lana pule ma lona malosi na fa’aalia i Lona toetu manumalo. O Ia na faia mea uma ma malosi uma, na Ia taofia ma saisaitia o Ia i totonu o Lana lava foafoaga, ma na tuuina atu o Ia ia maliu i lona lava finagalo malie (Filipi 2:6-9). Peitai, i le faanoanoa tele o seoli ma le malaia, na Ia toe tu manumalo mai le oti ma le tuugamau, na Ia fanaua le Ekalesia, ma ua fai nei o Ia ma Alii e pule i mea uma. O Ia le Kerisimasi.

***F. Sulu***

*“<sup>20</sup>Ona foi mai lea o leoleo mamoe, o vivii ma faafetai i le Atua, ona o mea uma ua latou faalogo ai ma vaai i ai, pei ona ta’ua mai ia te i latou.” Luka 2.*

O se tasi ulua’i paionia na malaga sopo atu i le Laugatasi Tele o Amerika, na malolo i le pito o le Karane Kanioni. O lona maofa tele ina ua ia mauaina se vanu tele e tasi le maila le loloto a e sefulu valu maila le umi e nimonimo atu i le vaai, na ia faapea ane ai, ‘E i ai se mea na tupu iinei!’ Ma e faapena foi ona maitauina e le fai evagelia Amerika o Atone Ropinisione ma faapea ane: ‘I le Kerisimasi...soo se tasi e tu e vaai ma faalogo, e tatau ona fesili pe se a le pisapisaō ma le vevesi fiafia o tagata. O se tamā ma se tinā mafaufau lelei e vaai teuteu matagofie o maota ma laoa, o moli felanua’i, o pesega malie ma faafiafiaga eseese, o tagata foliga fiafia ma tamaiti ta’aalo solo, aemaise o sauniga lotu ma musika mamalu ma le paia, e mafai foi ona latou faapea ane, ‘E i ai se mea na tupu iinei!’

Ioe, o le upu moni, sa i ai le mea na tupu. E tatau ona tatou ta’u ma tala’i atu i le lalolagi...na asiasi mai le Atua i lo tatou paneta. O lona Alo...na afio mai e faailoa mai lona Tamā ma maliu e faamagalalo a tatou agasala (Ioane 1: 1 – 14). Na Ia ola faatasi ma tatou, ina ia mafai ona tatou ola faavavau faatasi ma Ia. Ina ua maua atu e leoleo mamoe le Mesia o taoto i le fale manu, na latou matua’i ofo auā o le vaaiga tonu ‘*e pei ona ta’ua mai ia te i latou.*’ Luka 2:20. O le i’uga, na latou ‘*foi mai lea..o vivii ma faafetai i le Atua, ona o mea uma ua latou faalogo ai ma vaai i ai.*’

Na latou toe foi i a latou lafu, i a latou pa ma fanua e galulue ai i se malosi fou, se loto fou ma se faamoemoe fou. E tatau lava ona latou toe foi. O tusia e Iona Uoka, ‘Pe a mae’a ona tatou faamamalu le fanau mai o Iesu, ona tatou toe foi lea i le ofisa...i le a’oga... i mea e masani ona tatou fai...e ave i tatou e le Atua i tumutumu mauga...faaali mai ia i tatou vavega mata’utia ma mea ofoofogia, peitai na te lē tuua ai i tatou iina. O lalo ma tua i le laufanua, i totonu o pa ma le mafuta faatasi ma le lafu, e ola ma tupu ai lo tatou faatuatua, o faafailele i le elele o le lalolagi o lalo nei. Ua mae’a le feteenaiga...o ai na te faamamā le gaogaosa, o ai e muamua vave alu i le fale, po o ai na te maua le fasi pai aupito lapo’a, ia tofotofa pe mata o Keriso moni o loo soifua i totonu o i tatou.’

***F. Sulu***

---

# ***O LE PEROFETA MULIMULI***

***(O le tala faa-fagogo ua faaSamoaia mai le tusi, 'The Last Oracle' tusia e James Rollins)***

“Ma i latou nei e lē matagofia?” na fesili atu ai Karai, a o ia vaai atu i le potopotoga o tamaloloa ma tama talavou.

“O le vana lona lima e faapea tala e le’i tupuga mai lenei tagata silisili ese. O i latou o ni tagata na faate’aina, faapea e palapalā tele e fefiloi faatasi ai ma tagata masani lautele. O i latou na sa latou vaaia ma tagofia pa’u o manu, o toto, otaota, e oo i tino o tagata oti. Sa tuli ese ma faasegisegi mai nofoaga o le vasega maualuluga, e faasā ona pa’i pe aai faatasi i ipu, tui ma sipuni. E oo i o latou ata e sa ona lafoia i luga o le au maumea. A e afai e te solia se tasi o nei tulafono, e fasia oe, sauāina matagā pe fasiotia.”

Na faalagolago atu Elisapeta. “A e leai ma se tasi na te taofia nei mea i le tutupu mai?”

Na manavanava atu Matesone. “O le faavae o Initia o loo tapu ai le faailoga tagata, a e o loo faia pea, aemaise lava i nuu tua. O le sefululima pasene o le faitau aofai o tagata o loo i le vasega o le lēmatagofia. E leai se solaaga. O se tamaitiiti e fanau mai i le akuta e faavavau lava o le akuta. Latou te tumau o tagata ua afaina ona o tulafono ua faitau meleniuma le leva, tulafono ua ta mau ai lo latou tulaga e i lalo ifo o tagata ola. Ma ia tatou faamaoni. E pei ona sa ou fai atu muamua, e tatau ona i ai se tasi na te galueaina nei laufanua uma.”

Na pu’eata e Karai le lautele o faataavalega o fanua faatoaga ma togalaau.

Na fa’auau pea Matesone. “O le au lē matagofia o se vasega o pologa o loo fausia ma faamau i totonu o soo se masini e gaosia. E ui ina o loo i ai sina alualu i luma i la latou itu, aemaise lava i aai, a o loo manaomia pea i nuu tua ni aufaigaluega, ma o le faiga faavaega e fetaii lelei ma latou. O nuu e pei o lenei na susunuina pe faatafunai ina ona sa latou fesiligia le siitia o latou totogi po o le faaleleia o tulaga e faigaluega ai. E pei o le masaloga o i ai nei iinei.”

Na ia luelue faasino atu i le vaega faafeiloi’i o loo amoina atu mea faigaluega faa-faatoaga.

“O i le Atua e,” na fai ane ai Elisapeta.

“E leai se mea a le Atua e faia i ai,” na fai atu ai Matesone ma le tiga. “E pogai uma ona o le tamaoiga. O lou tamā sa fai ma fesoasoani malosi

mo nei tagata. Lata mai nei sa ia fetaia’i ai ma le tele o faafitauli i le fia maua o le lagolago o le au ioki ma tagata lililo faa Parāmā.”

“Ona o lona fesootaiga ma le au lē matagofia?” na fesili ai Elisapeta.

“O lena...faatasi ai ma lona sailiga o le puna o le maka kenera i totonu o le au lē matagofia. Ina ua salalau le tala i le mea lena, e tele faitotoa na tapunia patatū atu i ona foliga. Manaia le i’uga mo le taumafaiga mo le malamalama atili. O le upu moni, na leiloa o ia, ou te talitonu sa tagata valeina o ia mo lena lava mafuaaga.”

Na talo atu Karai ia Rosauro e taofi ua lava i le pito o le aloiafi mai le mumū o le afi o susunu ai le otaota. “Ma lenei nuu? O iinei na vaaia mulimuli ai Dr Poleki?”

Na luelue le ulu o Matesone. “O le taimi mulimuli na ou faalogo ai ia Atipale o se talanoaga fiafia i le telefoni. Na ia maua ni sailiga ma sa fiafia e faasoa, ona te’i lea ua ou lē toe faalogo poo fea o ia. A e sa masani ona faapea lana amio —e nimo atu mo ni masina i nofoaga tuufua, fealua’i mai lea nuu i lea aai. O nofoaga sa leai ni igoa ma inosia e i latou o le vasega i luga atu. A e mulimuli ane, ona ou fefe lea i se mea e sili atu ona leaga.”

“A e faapefea nei tagata?” na fesili ai Karai. “E i ai se mea tatou te ono fefefe ai mai ia i latou?”

“E leai.” Na tatala e Matesone le faitotoa o lana taavale, ma totoo i lona tootoo e tu ai i luga. Na mulimuli atu Karai. Na matala uma isi faitoto’a, ma ulufafu isi tagata uma. “Ia tu latalata i loli,” na ia lapata’i atu ai.

Na savali tauto’ai atu Matesone agai i le afi a o mulimuli atu Karai. Na valaau atu le polofesa i le faa-Initia. Na malamalama Karai i nisi upu mai lana a’oa’oga o lotu Initia ma le faafilosofia, a e sa le’i lava e manino ai i le mea na valaau atu ai le tamaloa. Pei sa fesili mo se tagata, sa tau autilo solo i foliga.

Sa tutu faasasa’o tamaloloa e pei se pa simā, faamalō ma latou auupega.

Na punou faano’uno’u le povi ma lana gugulu, pei ua na iloa le tulaga vevesi o le a i ai.

Mulimuli ane ona tu lea o Matesone i le va o faaputuga tafuna’i e lua. Na malosi le manogi o le ‘ea, i totoga susunu ma pa’u na mu. Na taumafai



---

malosi Karai e ‘aua nei pupunia lona gutu. Na toe talo atu i tua Matesone i le loli ma tautala pea. Na lagona atu e Karai o ta’u le igoa o Atipale Poleki mulimuli atu ai le upu Initia o le pītī.

Afafine.

Na faliu uma le vaai a tamaloloa ia Elisapeta. Na tuu ifo i lalo a latou auupega. Na talanoa, ma faasino o latou lima ia Elisapeta. Ona taape lea o le pa tamaloa i le agaga faafeiloai. O ni tama se toalua, ma o la’ua leo tetele i le fiafia, na tamomo’e i tua i le vaapiapi i le va o fale maa e lua.

Na liliu atu Matesone ia Karai. “O Akuta iinei latou te fa’aaloogia tele Atipale i se tulaga maualuga. Sa le’i i ai so’u taumate o le vaaia o le afafine o le tamaloa o le a taliaina ma faafeiloai fiafia. E leai se mea tatou te popole pe fefefe ai i nei tagata.”

“Se’i vagana lo tatou pesia i o latou siama,” na fai atu ai Koualasaki a o latou taunuu atu ma isi.

Na so’a atu e Elisapeta o ia i lona itu.

Na ta’ita’i atu i latou e Karai i totonu o le aai, ma lona iloa e tele atu mea latou te popole i ai nai lo manava tiga.

## 8.02 afiafi

Na kolosi atu Elisapeta i le va o tafuna’i. O tala atu o lona mumū, na fafagu ai le nuu. Na amata ona tatagi malomaloā le tagipalau ua ta e se tasi. Na aliali mai se fafine, o le afa o ona foliga sa ufiufi i se sikafu. Na ia faasino atu i latou i le ogatotonu o le nuu.

A o ia faliu, na iloa atu e Elisapeta vaaiga o le tino e tumu i ma’ila’ila ma patupatua o ufiufi i lalo o le sikafu. Na iloa atu e Matesone le mea sa maitauina e Elisapeta.

Na ia faalagolago atu. “O le a le mea na tupu ia te ia?”

Na tali lemu atu le polofesa ma luelue faasino i le fafine. “Na ta’ua o ia e lou tamā. O lana tama na maua o fagota i se vai o tagata maumea. Na alu atu le fafine e otegia lana tama ma tuli ese, a e na latou pu’ea ai i laua. Na sasa e le nuu le tama a e sasa’a le vailaau oona i foliga o le fafine. Na ivi le isi ona mata ma faaleagaina se vaega tele o ona foliga.”

Na liu aisa le tino o Elisapeta i lona fefe. “Matua’i mata’utia.”

“A e na ia manatu o ia ua laki. Auā sa le’i faia foi ia te ia ni sauaga matagā.”

Na mulimuli atu Elisapeta i le fafine ma lona te’i, ma le ofo i le toa o lenei fafine, i faiga lē taupulea a nei tagata agaleaga, ma lona sao mai ai.

Na taitai i latou e le fafine ui atu i auala pi’opi’o solo aga’i i le ogatotonu o le aai. Sa tafu ai se isi afi. Na potopoto ni tagata i laulau faataamilo i se pamu vai. Na tafitafi e ni fafine laulau, ma latou laulau ane ni mea’ai. Na toatele tamaiti na fetamo’ea’i solo, leai ni seevae, leai ni ofutino.

A o savali atu Elisapeta, e toatele tamaloloa na punonou o latou ulu, o isi na pa’i i le eleele a o ui atu o ia. E manino lo latou fa’aaloalo i lona tamā. Sa na matuā lē iloa le mea a lona tamā na fai iinei.

Na faasino atu e Matesone lona tootoo i tamaloloa. “Na tele mea lelei sa fai e Atipale i nei tagata. Na ia faailoa ma tutuli ese ni vaega’au o tagata tau sa latou faasoesā iinei, ma siitia o latou totogi, faaleleia togafitiga o ma’i ma le tulaga o a’oa’oga. A o le mea sili lava, sa ia fa’aaloogia ma alofa ia i latou.”

“Ou te le’i iloa.” Na memumemu lemu ai o ia.

“Na ia mauaina lo latou talitonu ia te ia. Ma o iinei i ona mauga na ia faasagatasi i ai i ana sailiga tau kenera.”

“Aisea na fai ai iinei?” na fesili ai Karai i le isi itu o le pelofesa.

“Ona e pei lava ona gaosia e Atipale le faafanua lea na ou fa’aali atu ia te outou, sa faapea foi ona ia faia se sailiga auiliili o le itumalo o le Puitapu. O se auala o faamaoniga o kenera na faasino tonu mai i mauga nei, a e ou te talitonu e i ai se isi mea e sili atu.”

“E pei o le ā?” na fesili mataita atu ai Elisapeta. “Ou te le mautinoa. O lona naunau mai i le itulagi lenei na oso i luga i le lua tausaga talu ai. Na faagata lana sailiiliga faalauaitetele i Initia ae amata ona faapito mai iinei.” Na toe tepa le polofesa ia Luka. “Ma le au Kipisi.”

Na toe manatunatu Elisapeta i le lua tausaga talu ai. Na faauma lona faailoga faa-fomai i Siasitone. E itiiti lava se la’ua fesootaiga ma lona tamā i lea taimi. Po o le onosai. O a la’ua talanoaga i le telefoni e mafuli i le puupuu ma le vevesi. Pe ana ia iloa ana mea sa fai, ma le ese foi o lana su’esu’ega, atonu e ese se tulaga e i ai. Ina ua latou taunuu atu i le ogatotonu o le nuu, na faafeiloai mai i latou ma tauanau atu i le laulau e

tali le sua. Ua faula'i taumafa – falaoa, araisa, fualaa'u ma susu – e faigofie lava a e faia ma le loto malie ma le fiafia. O se tasi fafine sa i ona tulivae na sa'eu le ulu o le sitiū i luga o le ogaumu. O lana tama sa aumaia otaota mago o manu papalagi e tafu ai le afi.

Na faatasi ane Koualasaki ma faalatalata ia Elisapeta. "E le o Peka Kigi."

"Atonu ona latou te tapuai i manu papalagi."

"E, ou te tapuai foi i ai. Aemaise pe a tunu vilivili ma ina'i i pateta vela lelei."

Na ataata Elisapeta. E faapefea ona fai soo e le tamaloa lena le mea e ataata ai le tamaitai? Na te'i le tamaitai ina ua iloa ua pipii tele mai le tamaloa, ona ia laa ese lea.

I le isi itu, o se tasi tagata o le nuu na tago ane i le kitara ma ta ta ona uaua, faatasi atu i ai ma le tasi sa i ai se faaila ma se isi ma le tagipalau.

O se tasi tagata umi e fou mai, na laa atu ia i latou. Sa foliga o i le ogatotonu o le tolusefulu, o lona lauao sa pupuu, selu momoe i le uu olive. Na laei o ia i ofu faaleaganuu o le hoti kurata, o se taai lanu tasi i le ie faatafafā e tautau mai le puimanava e tau i le tapuvae, faatasi ma se tuni e faamau i luga o se ofutino lima uumi. I lona ulu sa i ai se pulou lalaga e ta'u o le kufi. Na ia ifo toele ma tautala faa-palagi ma se i'uleo faa-Peretania.

"O a'u o Apihi Panitee, a e ou te fiafia pe a outou valaau a'u o Api. O matou i Initia e i ai la matou alagaupu: Ata iti tevo pahava. O lona uiga, 'O matou malo e pei o ni atua.' Ma e leai se isi e sili ona fetau i ai lea upu nai lo le afafine o Polofesa Atipale Poleki, o se uo mamae ia te au." Na ia talo atu faasino i latou i le laulau. "Afiio mai ia."

Na latou usitai, peitai e le'i pine ae liua lana ataata i le foliga faanoanoa, ina ua ia faalogo atu i le mea ua tupu i lona tamā. "O se faanoanoaga tele i lona toesea. Ou te avatu faamaisega, Misi Poleki." Na faalo'ulo'u ifo lona ao e tali atu ai.

"Na vaai mulimuli o ia iinei i lo outou nuu," na faapoopo atu ai Karai ma genogeno atu ia Matesone. "Na ia valaau mai i le polofesa, fai mai o loo malaga mai iinei."

Na taletale Matesone e faalaulelei lona fa'a'i. "Sa matou faamoemoe o le a outou aumaia se ata po o fea na aga'i i ai Atipale."

"Na ou iloa lava sa lē tatau ona alu toatasi o ia," na fai mai ai le tamaloa ma le lūlū o lona ulu. "Peitai sa ia lē faatali."

"Na alu i fea?" na fesili atu ai Karai.

"O se mea sesē le ave o ia i lena nofoaga i le amataga. O se nofoaga ua faamalaiaina."

Na aapa atu Elisapeta ma pa'i atu ona tumutumulima i le lima o le tamaloa. "Afai e te silafia se mea... soo se mea..."

Na iloa atu le folofolo malie o lona fāua a o ia tago ifo i le taga o lona ofu. Na ia tuu mai i fafo se tama'i ato sa tatagi. "Na amata lava mea uma ina ua ou fa'aali atu i lou tamā mea nei." Na ia tatala le ato ma sasa'a atu mea na i ai i luga o le laulau. "O mea nei sa masani ona matou maua pe a matou galulue i le fanua lenei."

O tupe siliva tuai, toetoe a uliuli pato'i i le leva, sa tatagi ma taavalevale. Na taavale atu le tasi ia Elisapeta. Na ia taofi i lona lima, ona ia siitia lea i luga. Na ia iloilo le pito i luga, soloi ese faaputuga palapala ma le 'ele i lona lima matua – seia oo ina ia iloa le mea sa ia uu.

I le laualuga, sa patupatu a e na manino lelei, sa i ai le ata o se fafine, o ona alafau na teuteu ma siosio e ni tamai gata se tele. O le ata o le Gorogono e igoa ia Metusa. Na iloa e Elisapeta le mea sa ia uaina. "O se tupe siliva Eleni o anamua." Na ia fai atu ai ma lona te'i. "Na outou maua nei mea i outou laueleele?"

Na lue atu le ulu o Api.

"Maoa'e." Na liliu atu e Elisapeta le tupe agai i le malamalama o le afi. "Na pulea e Eleni le Punitapu mo se vaitaimi. Faatasi ai ma Peresia, Arapi, Mugali, Afakanisitana. E oo ia Alesana le Sili na ia tau le taua iinei."

Na sii a'e e Karai le isi tupe, ma ona foliga faanefu, ma faasino atu ia Elisapeta. "E lelei lou vaai mai i le mea lea, Elisapeta."

Na ia tago atu ma iloilo. Na amata ona gatete ona tamatama'ilima. I lona laualuga, sa i ai se malumalu Eleni na mamau ai. Ma e lē o soo se malumalu. Na ia faataupupula atu i pou e tolu sa faavaa ai se faitoto'a pogisa. Na manino mai ai i totonu se mataitusi E lapo'a.

"O le malumalu o Talefaia," na ia valaau leotele ai.

"E foliga tutusa ma le tupe na gaioia mai e lou tamā mai le fale mataaga."

Na ia tauivi e fia malamalama, a e sa ia le mafai ona mafaufau. E peiseai ua faasipaka lona fai'ai

---

e se tasi. “O anafea... anafea na outou ulua’i faasino ai nei tupe siliva i lo’u tamā?”

Na faasenunui mata o Api. “Ou te le mautinoa. E tusa ma le lua tausaga talu ai. Na ia fai mai e teu lelei ma puipui ia malu, peitai ona o lea ua maliu, ma o oe foi o lona afafine...”

Sa ia le’i lagona lelei atu. Lua tausaga talu ai. O le taimi tonu lea na taumafai ai lona tama ia te ia e galue i le fale mataaga i Teli. Na ia lagonaina ua ia ‘u’u le tupe na aumaia o ia i le tulaga maualuga i le fale mataaga.

O le pisi tele o lona tamā, mata sa manao o ia na te tuliloa le sailiga o le misiterio leni. Na emo emo a’e se aloiafi o le ita i totonu, peitai sa ia iloa foi le toatele o tagata o le nuu i ona autafa ma le tulaga na sauaina ai latou. Atonu sa le’i mafai ona tuua e lona tamā, na te lē mafai ona tuulafoa’i i latou. Ui i lea, sa tatau lava ona ia ta’u atu ia te ia se mea.

Sei vagana... atonu sa ia puipuia o ia?

Na ia lulu lona ulu, ua tumu i fesili. O le a le mea lea e tupu iinei? Na ia saili ni tali i le isi itu o le tupe. O le laualuga na uliuli pato’i mai se faailoga lapo’a ua aiaina sa le’i foliga mai e faa Eleni.

Na maitauina e Api lona foliga faaletonu. Na ia faasino atu i le tupe, ua uma ona ia su’esu’ea. “O le uili sakara lena. O se faailoga Initū ua leva.”

A o le a lana mea o loo fai i le tupe Eleni? Sa ia manatunatu ai.

“E mafai ona ou vaai i ai?” na fesili atu Luka. Na ia savali atu taamilo i le laulau ma tilotilo i luga atu o tauau o Elisapeta. Na faamalō lona tino, ma ona tamatamailima ua pipii mau i pito o le laulau. “O le... o le faailoga lena. O loo i ai foi i le tagavai a Romani.”

“E a?” na fesili ai Elisapeta.

Na tu sa’o Luka, o ona laumata ua gatete i le lē mautonu. “O le faailoga lena na filifilia ona o le upu Sanesakerita o le ‘siakara’ o lona uiga o le uili. E faapea le tala e faasino i le uili o le taavale a le Kipisi, o le faailoga faatusa o lo matou tupuaga feoa’i solo, a o faamamalu foi o matou faasinomaga Initia.

A e sa i ai lava tala fela’ua’i o le faailoga e i ai ona uiga loloto, ma le tele o ona sootaga anamua i totonu o aiga.

A o talanoa isi i lona taua, na iloilo lelei e Elisapeta le tupe ma le filemu, ua amata ona ina lagona ma maua se mea moni.

Na faalagolago atu Karai ia te ia, ua na faitauina o i ai se mea ua ia lagona. “O le a?” Na ia faafetaia’i lana pupula. Na ia tuu a’e i luga le tupe ma faasino i le itu o i ai le malumalu. “Na toso manoa e lo’u tamā ina ia ou maua lena tulaga i le fale mataaga, ina ua faato’a ia maua le tupe siliva leni.” Na ia liliu le tupe i le itu o i ai le sakara. “A o le taimi lava foi lea e tasi, na ia amata ai ona su’esu’e le au Kipisi ma lo latou fesootaiga i Initia. O itu e lua o le tupe, e lua tafa o suesuega.”

Na liliu e Elisapeta le tupe i lona itu. “A o le a le mea o loo taatia i le va o nei mea e lua? O le a le fesootaiga?” Na ia liliu atu ia Api Panitee. Na te le’i ta’uina atu mea uma ia i latou.

“O fea sa alu i ai lo’u tama?” na ia fesili atu ai i se leo ua ma’ ai.

O se tauvalaau mai se tasi o le nuu na tali atu ia te ia. O se tamaloa na tamo’e mai le mea o i ai le afi. Na uma faafuase’i le musika – a o se leo tagipalau mamao ese na lagona pea, o se patapatatū o le tātā o le fatu taia i le fatafata.

Na ea a’e i luga Karai.

Na tu i luga Elisapeta, ua le mautonu, ma tilotilo atu agai i mauga, taumafai e vaai le itu o sau ai le leo, peitai e pei e sau mai itu uma – ona aliali mai lea o molī e tolu mai luga o le lagi.

O helikopa.

“Tagata uma, toe foi faavave i le taavale!” na faataiō atu ai Karai. Na ‘e’ē faa-Initia atu Api, valaau atu faatonuga. O tamaloloa ma fafine na sosola solo i soo se itu. I totonu o le vevesi, na te’a ese ai Elisapeta, taavili solo i le taia e tagata. Na ia taumafai e su’e ma mulimuli atu i le latou vaega. O helikopa sa pei o ni aeto faatifo ifo ma felele i luga o le nuu, ona faataamilo lea. Na vaai a’e Elisapeta i le lagi, ma ausulusulu solo, ona mau atu lea o se lima mafiafia ma sapo ia te ia. Na afisi e Koualasaki lona pui manava ma sii a’e o ia, faatu i ona vae ma faataalise atu i ai.

“Faavave mai, pepe.” Na osooso ma sululusulu atu Koualasaki i totonu o le vevesi e pei o se maa taavalevale.

I tulimanu o le nuu, na faaopeopea ifo ai helikopa. Na toulu ifo maea mai faitoto’a na matala i o latou itu. E le’i oo ifo pito maea i lalo i le elelee, a ua sosolo ifo ai tagata, foliga mamafa faatasi ma latou pulou ma mea faigaluega.

Ailoga a latou taunuu i la latou taavale

***(soso’o atu Sulu Samoa Ianuari 2024)***

---

# **O E UA FAI I LAGI LE FOLAUGA**

## **ALAOVAE ALAOVAE FT**

**28/3/1930 - 7/12/2023 (93+8+10)**

O le susuga i le Toeaina Penisione o le EFKS Peteleema Fou, Vaitele Fou, Pulega Faleata Sisifo o galulue ai ma lagolago i le susuga faafeagaiga Iosefa Afutiti FS ma Tina. O ona tua'a o Alaovae Tuiolomu le tama, a o Tapai Ioane le tina. Na faaipoipo atu i lana manamea o Elisapeta Po'e Masofa o Magiagi, i le tausaga 1961. E to'avalu o la'ua alo aofia ai le susuga Faasalafa Alaovae FT (EFKS Matatufu) ma Vaitoomuli Laupama Tokan Solomona FS (EFKS Sogi). E 23 fanau a fanau, 5 fanau a fanau a fanau. O se tala otooto o lona soifua tautua i le Ekalesia:

1957 A'oa'oina Kolisi Leulumoega Fou  
1958-1961 A'otauina Kolisi Faafaifeau Malua  
1964-1980 Faafeagaiga EFKS Vaitoomuli (16)  
1966 Faau'u Tofi Faifeau Samoa  
1980 Faamavae mai EFKS Vaitoomuli Palauli.  
1981-2000 Faafeagaiga EFKS Vaimoso (19yr)  
(35 tausaga o galue faa-faifeau tausi nuu)  
Komiti Tupe, Komiti Au Leoleo, Komiti Au Taumafai, Matagaluega Faleata.  
1992 Toeaina Pulega Faleata Sasa'e  
1997 Toe filifilia i le tofi Toeaina.  
2001 Penisione ina ua 70 tausaga o le soifua.  
2001-2003 Tautua Matafale EFKS Peteleema fou, Pulega Faleata Sisifo.  
O lona sauniga faaleaiga na faia i le Aso Toonai, 16 Tesema 2023 na ta'ita'iina e le Toeaina, Susuga Faasalafa Alaovae FT. O lona toe sauniga sa faatautaia e le Pulega Faleata Sisifo i le Aso Gafua 18 Tesema, i le malumalu o lana Aulotu sa tautua mulimuli ai, EFKS Peteleema Fou. Na ta'ita'i le susuga Tautua Aurelio FT, Iosefa Afutiti FS na faaulufaleina lona sa, fai le molimau faaleagaga ma ta'ita'i le sauniga i le tuugamau. O Nouata Saifoloi FS na faitauina Afioga paia a le Atua, Siaosi Mataia FS na faia tatalo, Muao Fagasua FS na faia le Lauga. Na molimau Amuia Seuala FT le Failautusi Komiti Au Toeaina, Tuilagi Ioane sui o le fanau, ma Iosefa Afutiti FS. Faamaiseina le Tina ia Elisapeta ma le aiga. Tautai a'e! Ulufale atu ia oe le auauna lelei ma le faamaoni, i le fiafia o lou Alii!

**Saunia: Faatonu Sulu Samoa**

## **ISA AKO LAF AE LE TAIUME**

**SEFO FS**

**7/6/1979 - 17/11/2023 (44+5+11)**

Na soifua mai i le Aso Tofi, 7 Iuni 1979 a e faamanava e le Atua lona soifua tautua i le Aso Faraile, 17 Novema 2023, a o saili togafiti ai i le maota gasegase o Malietoa Tanumafili II i Tusiviva (ua atoa ai le 44 tausaga, 5 masina ma aso e 11 o lona soifua). O le susuga Isaako ma le faletua ia Venice sa latou osi feagaiga ma le Aulotu EFKS Letui i le tausaga 2016, ma galulue ai seia oo ina tatala la latou feagaiga ia Iuni 2023 ina ua gasegase le Faifeau.

Na aumai i tua lona tino maliu mai le maota maliu o Pa'u Sefo i Safotulafai i le taeao o le Aso Toonai, 2 Tesema 2023, ma taoto ai i lona aiga ina ua mae'a lona ulua'i sauniga. O le itula e 10.00 i lona lava aso na faia ai lona sauniga mulimuli i le Malumalu o Mataniu Feagaimaleata, EFKS Sapapalii, ma sa matou galulue ai ma nisi o Faafeagaiga o le tausaga a Isaako (2007 – 2010) i le Kolisi Faafaifeau i Malua.

O le susuga Peni Meaalofa FS (faafeagaiga EFKS Faleapuna) sa faaulufaleina le sa o Isaako i le malumalu, a o Vaigafa Paleono FS (faafeagaiga EFKS Vaovai) sa faitauina le Tusi Paia ma saunia Talosaga. O le susuga Filiilagi Tau Toleafoa FS (faafeagaiga EFKS Samamea) na saunia le latou Molimau, a o Semikueva Su'a FS (Ofisa A'oa'oga Kerisiano) na saunia le Lauga. E ese foi le matagofie o le vaai i le maopoopo ma le mafanafana o mafutaga a ia foi uso a Auauna i le galuega, ua le gata i taimi a o latou a'o'oga i le Kolisi, a o lea lava o loo fa'aaauu i lo latou i ai, seia oo ina fetalai le Matai o le Galuega, "*Ua lelei ia, le auauna lelei e, ma le faamaoni...ina ulufale mai ia i le fiafia o lou Alii.*"

O a'u sa ta'ita'i ma faia le molimau e faaopoopo i molimau a le faletua ia Venice Isaako, le tina o Isaako ia Matauaina, faapea uso ma tuafafine o Isaako, ma nisi o ana uo ma ona aiga. Ona matou faai'u ai lea i lona oliolisaga tumau, i luma lava o lona maota i Sapapalii, ma faatofa atu ai i le Pese Faamavae a le Au Kerisiano, *Talofa uso e, tofaina oe..Tofa, tofa, tofa.*

Na tauluga le aso i le osiga taulaga a Aiga e ala i fa'aaloaloga maoa'e ma maualuga, e pei ona sa tu tootoo ai le tofa ia Taoai Laumaopo po o le susuga foi ia Papalii T. Laumaopo. Ia viia le Atua i le agalelei o Aiga ma ia faamanuia i latou uma. Faamaise pea le Agaga o le Atua i le tina ia Venice ma le fanau faapea aiga.

**Saunia: Susuga Esera A. Esera FS**  
**Faafeagaiga EFKS Sapapalii**  
**Taitaifono Fono Tele EFKS.**

## **MENU PUNI FS**

**28/10/1947 - 7/12/2023 (76+1+10)**

O le Susuga i le Faifeau Penisione Mālōlō o Menu Puni na soifua mai i le Aso Lua 28/10/1947, ae na malii i le Aso Tofi 07/12/2023. E malii le Faifeau Penisione ua 76 tausaga, 1 masina ma aso e 10 lona soifua. E leai se Api o le Galuega o faamauina ai le tautua ma le soifua faale-agaga o le tamā i totonu o le Aulotu sa tautua ai i tausaga e tele ua mavae. A o nisi nei o vaega o le auunaga a le Tamā Penisione ma lona Faletua ia Filifilia Puni ua mafai ona faamauina a o matou mafuta ma galulue ai i totonu o le Pulega Motu i Saute i le Matagaluega Niu Sila i Saute. Sa galulue ma tautua i le tofi tiakono i le Ekalesia EFKS Christchurch i tausaga e tele ma lona faletua Filifilia Puni. Mulimuli ane avea ma A'oa'o Fesoasoani. Na ulufale i le Kolisi Faafaifeau i Kanana Fou i le tausaga 2004 – 2008. Na iu mai i le Kolisi Faafaifeau ma fa'auau pea le tautua i totonu o le Pulega Motu i Saute, se'ia oo ina tofia e galulue faamisionare i le Aulotu EFKS Blenheim i le aso 17/01/2009. O le Fonotele o le tausaga 2010, na faauuina ai i Malua mo le tofi Faifeau Samoa (FS). O le aso 12 Setema 2015, na osi feagaiga ai ma le EFKS i Blenheim, seia oo i le aso 15 Tesema 2018, na tatalaina ai le feagaiga ma le Aulotu, ina ua aulia tausaga e penisione ai ma avea ai o i la'ua o Faifeau Penisione Mālōlō. Na mālōlō ane i si o la aiga i Christchurch ma faauau ai pea le tautua faamatafale i le Ekalesia EFKS Christchurch. Tele lava gasegase sa tau'ave e Menu, a e sa faigata lava ona iloa e le toatele ona o se tagata e finau ma tiga. Na malaga i Ausetalia e asiasi i le fanau ma malii ai lava i le aso 07/12/2023.

O lona sauniga faale-aiga sa faia i le EFKS St Marys i Sydney Ausetalia. O Petaia Limā (FS) na ta'ita'i i le sauniga, o Fofogafā Latai (AF) na saunia talosaga, o Tupai Leota (AF) na faitauina le Tusi Paia, o Nepo Anae (AM) na saunia le upu faamafanafana. Na molimau nisi o le aiga faapea foi lo la alo tamaitai o Talalelei Iakopo e tusa o le mafutaga ma si o latou tamā.

O ona toe sauniga sa faia i Castlebrook Memorial Park. O a'u na ta'ita'i i ona toe sauniga. O Petaia Limā (FS) na momoli maia lona sa, o Keresoma Seuala (FS), o le Faafeagaiga a le Ekalesia i Christchurch na saunia le upu faamafanafana. Sa faa'utu lava le upu faamafanafana i le Manatu Autu o le Tusi Faitau Aso o lea aso "Tofotofo ma iloa e lelei le Alii" E le mafai ona 'alo se tasi i faafitauli e tutupu i le soifuaga nei aemaise o le oona o tiga ua faatusa lea i le oti. Tofō i tiga, ma 'aua nei matata'u, auā o loo lotolotoi ai lava le Atua. O le tofo i faafitauli o le ola ma le loto maualalo ma le faatuatua, e ola ai le agaga o le tagata, ma o le agalelei lena o le Atua o loo galue faamaoni ai pea mo Lana fanau. Na molimau le Tinā Penisione Mālōlō ia Filifilia e tusa o le mafutaga ma le Tamā Penisione. O ia o se Faifeau lototele i le Galuega, e ui ina to'agaogao, a e sa finau pea ma onosai. E lotomaulalo ma fa'aaloalo. E āuā i si ana Aulotu, auā e leai ni tagata matutua e to'atele i ulugalii talavou ma a latou fanau. Na faaopoopo foi le Susuga ia Keresoma (FS) ma molimau i le taimi puupuu na mafuta ai ma le Faifeau Penisione ia Menu, o se tamā e to'amālie. E le vevesi vale ona lagona, a o lana tofā e maua ai le to'afilemu o le Aulotu. Na faaiu i ona toe sauniga mulimuli i luga o le tuugamau, na taitaiina e le Susuga Keresoma Seuala (FS), ma matou faatofā atu ai i le Tamā Faifeau Penisione i le pese faatofa a le au Kerisiano, "Talofa uso e tofaina oe, ua sau le itupo e malolo. E ala oe pe a mavae le po, Tofa, Tofa, Tofa."

SA E TAU LE TAU A LELEI, SA E TAOFIMAU  
PEA I LE FAATUATUA, MA UAI'U FOILAU  
TAUSINIOGA! FAAFETAI TAUTUA!  
FAAMĀLŌ GALUE TAMĀ.

Le Auauna lelei e ma le faamaoni, ulufale i le fiafia o lou Alii.

***Saunia : Faleulu Malaulau (KMTA)***  
***MATAGALUEGANIUSILAISAUTE.***

---

## **EVOTIA GALE ELISARA**

**1/11/1937 - 6/6/2023 (86 tausaga)**

Na soifua mai le tina ia Evotia Gale Elisara i lona aiga i le alalafaga o Vaisala Savaii ia Novema 1937. Na maliu o ia i le Aso Lua, 6 Iuni 2023 ma ua atoa ai le 86 tausaga o lona soifua. O le tina ia Evotia Gale Elisara, o se tasi o toe ulutaia o le Ekalesia i Ketesemane. Sa lotolotoi ma si ona alii le susuga i le A'oa'o Fesoasoani ia Aripa ua maliu, i le faavaeina o lenei Ekalesia. Sa avea i laua ma Tiakono ma avea foi ma A'oa'o Fesoasoani a le Ekalesia, seia oo ina maliu lona alii le susuga Aripa i nai tausaga ua mavae atu. Sa fa'aaauu pea ona tautua le tina ia Evotia i lana Ekalesia e pele ia te ia, seia oo ina valaau lona Matai ma faamuta ana galuega i le aso 6 Iuni 2023. O se tina agamalu, tausaaafia, loto alofa ma fa'aaloalo ma loto maulalo. E fiafia tele ma toaga o ia i sauniga lotu faapea foi i Tofiga ma Sauniga faapitoa a le Pulega ma le Matagaluega. O se auuuna faamaoni i lona valaauina. O upu lava a lo tatou Alii, "*Le auuuna lelei e, ma le faamaoni, ulufale mai ia i le fiafia o lou Alii.*"

O lona sauniga faaleaiga sa faia i le Aso Faraile 9 Iuni 2023 i le itula e 5.30 pm i le afiafi i le malumalu EFKS Ketesemane. Sa ou ta'ita'i i le sauniga, o le susuga Meki Lauvi FS na saunia le Lauga, o Talosaga na saunia e le A'oa'o Fesoasoani o Iopu Tagatauli. O le faitauina o le Tusi Paia sa fofogaina e le A'oa'o Fesoasoani ia Tuuvaamalefoe Misi Misipati. Sa molimau fanau, ma fanau a fanau, o aiga ma uo ma e masani i le mafutaga ma le tina ma lona soifuaga i le aiga. O lona toe sauniga sa faataunuuna i le Aso Toonai 10 Iuni 2023 i le 9.30 taeao. Sa ta'ita'i i le Toeaina o le Pulega susuga Aufaga Faafia FT ma na saunia talosaga. O le lauga na saunia e le faafeagaiga susuga Nove Vailaau FS. Sa ou faaulufale lona sa ma molimau e tusa ma lona soifua faaleagaga ma le soifua galue aemaise le mafutaga ma le tina. Sa ou faai'uina lona sauniga i le maota e faaliu efuefu ai lona tino maliu, ona e fia tuuina atu lona lefulefu i se taimi o i luma e le nofo a alo e lagomau i lona aiga i Vaisala Savaii e tusa ma lana mavaega i le fanau. "*Amuia e ua oti, o e ua oti o i le Alii.*" Na faamavae atu i le tina i le pese a le au Kerisiano. Tofa, tofaina Evotia Gale Elisara. Ia manuia lau malaga. **Saunia: Susuga Kuatemane Ulutui FS, EFKS Ketesemane.**

---

## **TO'ATOLUOALI'I**

**MARIA BAKER**

**15/1/1945 - 13/11/2023 (78+9+30)**

Na soifua mai le tina ia Toatoluoaalii Maria Baker i lona nuu o Vaiala i le Aso Gafua 15 Ianuari 1945, ma ua valaau lona Matai e mapu atu i ona aao mai ana feau i le Aso Gafua, 13 Novema 2023. Ua atoa ai le 78 tausaga 9 masina ma aso e 30 o lona soifua. O Toatoluoaalii o se tasi o tina matua o le Ekalesia. Na valaau le Atua i si ona alii le afioga i le Tiakono ia Taimaiono Baker i le tausaga 2016. Ona ia fa'aaauu pea lea ona galulue ma tautua ma le fanau i le atina'eina o le Ekalesia i Ketesemane i soo se itu o le galuega. O se tina tausaaafia, galue fiafia ma faamaoni i lona valaauina, e le gata i le atina'eina i totonu o si ona aiga, a e faapea foi i le lotu. O se tina e finau ma tauivi mo le manuia o lona aiga ma le galuega a le Atua.

O le Aso Faraile 17 Novema 2023 itula 5.30 afiafi sa faia ai lona sauniga faaleaiga. Sa ou taitai le sauniga ma fai le Upu faamafanafana. O le A'oa'o Fesoasoani susuga Tuuvaamalefoe Misi Misipati sa saunia talosaga, susuga A'oa'o Fesoasoani Iopu Tagatauli sa faitauina le Tusi Paia. Na molimau fanau ma fanau a fanau, aiga, uso, tuagane, uo ma au meamamae i le latou mafutaga ma le soifua o le tina. O le Aso Gafua 20 Novema 2023 i le 10.00 taeao na faia ai lona toe sauniga faamavae. Sa ou taitai i le sauniga, faaulufale lona sa, ma molimau e tusa ma lona soifua auuuna i le lotu. O le Toeaina susuga Tui Sopoaga FT na saunia le lauga. O le A'oa'o Fesoasoani ia Iopu Tagatauli na saunia talosaga, a o le A'oa'o Fesoasoani ia Tuuvaamalefoe Misi Misipati na faitauina le Tusi Paia.

Ona faai'u lea o lona toe sauniga i lona oliolisaga tumau i Whenua Tapu ma faamavae atu ai i le Pese a le au kerisiano, Talofa uso e, tofaina oe Toatoluoaalii Maria Baker. Ia manuia lau malaga. "*Le auuuna lelei e, ma le faamaoni, ulufale mai ia i le fiafia o lou Alii.*"

**Saunia; Susuga Kuatemane Ulutui FS**  
**EFKS Ketesemane, Pulega Ueligitone Matu,**  
**Matagaluega LAUMUA O AOTEAROA.**



# NA O AFIOGA E TULEI MAI FOFOGA O LE ALII

## OLE AMIO

*“<sup>4</sup>E lē aogā le oloa i le aso o le toasa; a o le amiotonu, e laveai lea nai le oti.” Faataoto 11.*

O le alii peresetene o Amerika ia Aperaaamo Linikolone na fai mai, ‘Toetoe lava o tagata uma latou te gafatia puapuaga, peitai afai e te mana’o e tofotofo pe faape’i le **amio** a se tagata, ona tuu atu lea ia te ia o le paoa.’ E faigofie ona tulimata’i ma faamamafa a tatou taleni auā, i se upu faalauaitete, e aumaia ia i tatou ni faaiuga lelei e faamanuiaina ai, ma e faafiafiaina ai foi, ma faamamaluina e isi tagata. I nisi upu, e i ai le elemeni o le loto fefete e fesoota’i ma a tatou taleni ma meaalofo ua maua. O le **amio** e fausia i le lotoifale. O lou lauiloa, o le mea lena e manatu ai isi tagata ia te oe, a o le **amio** o le mea lena, na o le Atua (ma oe) e silafia, o lou tagata moni lena. Pe afai e te mana’o ia alualu mamao lau faatamasoaliiga, ia e faamamafa lau **amio** e sili atu nai lo lau taleni ma le agavaa. Fai mai le Faataoto 11, *“<sup>30</sup>O fua o le amiotonu, o le laau o le ola lea; ma lē na te maua agaga, e poto ia.”* Afai o loo e naunau i ni faaiuga lelei, o lou tagata ma lau amio, e ao ina muamua ma faasilisili nai lo au mea e fai. Ina ia faataunuina ma ausia faamoemoega maualuluga, e ao ona avea oe ma taitai e sili ona lelei. O le auala sili e faatosina mai ai tagata, o le avea lea o oe ma tagata e lelei le **amio**. Pe afai e te faamasani e fa’aali le amio tonu, faautauta ma le naunauta’i ia manuia, o lou faia lava lena o se tautalaga mo i latou i ou tafatafa, ma tosina mai ai i latou ia te oe. E seāseā ni mea tetele e ausia taitoatasi, a e o le galuega faifaatasi a le toatele. Lona uiga afai e te manaomia ni tagata lelei tou te faatasi, e ao ia te oe ona solomua le avea ma tagata e sili atu ona lelei le amio. E sili ona faamaonia lenei mau pe afai o oe se tagata e gafatia mea tetele. O lau taleni ma le agavaa la te siitia oe maualuga atu i isi tagata, a o lau amio faalētonu ma leaga, e te toe pa’ū ifo ai i le lua maualalo. *“<sup>4</sup>E lē aogā le oloa i le aso o le toasa; a o le amiotonu, e laveai lea nai le oti.”* O se ta’ita’i atamai na te lototele e ta’utino, **‘Ou te lē atoatoa, a e ou te iloa o Ia e atoatoa. Ma o loo o’u taumafai i le mea sili e gata ai, ia ou pei o Ia i la’u taleni faapolofesa, ma la’u amio faalotoifale.’** *F. Tolua*

*“<sup>12</sup>Amuia le tagata o lē onosai i faaosoosoga.”  
Iakopo 1.*

Talu ai lona aulelei tele, na tosina mai ai e Iosefa ia te ia le tu’inanau lē manaomia o le faletua o lona alii pule. O aso taitasi sa taumafai ai le fafine e faaosooso ma faasesē le loto ma le mafaufau o Iosefa aemaise manaoga o lona tino. O le taimi tuana’i lena. A e tatou se’e mamao atu la i le lumana’i: pe ana fetaiia’i Iosefa ma lena tulaga maualuga o faaosoosoga, ina o avea o ia ua na o se pologa, manatu ane i le tulaga maoa’e mata’utia o faaosoosoga la te fetaiia’i, ina ua tula’i mai o le palemia o Aikupito! O lau gaioiga e fai ma le amio sa’o i nai mea iti, e faa-aupegaina ai oe e fai faaiuga i le amio sa’o i mea tetele o le soifuaga. I le itulā o faaosoosoga, o le a valaauina oe e filifili i se tasi o auala nei e lua: o le amio, ma le tofa fetuutuuna’i. Ma o taimi uma e te filifili ai i le amio (tausisi i le amio ia lelei, ia tonu, ia faaleatua), o le a faateleina lou malosi faaleagaga, e ui ina o le a afaina ai lou tulaga, lau galuega ma lou lauiloa lautele. Ia maitau lelei:

i) O le amio, e lautele atu nai lo na o se tautalaga. E te manatua le auala tuai o a’oa’oga e ta’ua o le *fa’aali - ma - ta’u* i totonu o a’oga? Pe afai o oe na o le ta’u a e leai se fa’aali, ona e tia’i lea o lou tagata e leai sou faamaoniga.

ii) O le taleni o se meaalofo, a o le amio o se filifiliga. O le taleni ma le agavaa o mea e te fanau mai ma oe; e itiiti pe leai foi sau mea e mafai i ai pe suia ai. A o le amio o se filifiliga e te faia i aso taitasi, ma e masani ona fai ina ua na o le Atua ma oe lua te silafiaina.

iii) O le amio na te aumaia faamanuiaga e tumau. E i ai le talitonuga faapea o vaiolini Sitarativaru anamua na fausia mai laupapa, e maua mai le itu o le laau e fesaga’i tonu ma matagi ma afā. Aiseā? Auā o laau e taia soo ma fetaiia’i pea ma faigatā, latou te aumai musika e sili ona leo malie. Ua e maua mai le ata faatusa?

iv) Mo se taimi lē tumau, e mafai ona siitia lou tulaga i luga atu o le tapulaa o lau amio, a o le a lē mafai ona e faatumauina ai. Mulimuli ane, o le a iloa e le lalolagi lou tagata moni.


O le mea lea, ‘aia e te naunau ina ia lelei lau galuega, a e ia sili ona lelei o lau **amio**.

*F. Tolua*

**ISAAKO LAFAELE TAIUME SEFO FS**



**MENU PUNI FS**



**EVOTIA GALE ELISARA**



**TOATOLUOALII MARIA BAKER**



**ALAOVAE ALAOVAE FT**

